0.0.1 karajakāya suttam

- 1. nāham bhikkhave sancetanikānam kammānam katānam upacitānam appaţisamviditvā¹ vyantībhāvam vadāmi. tance kho diţţhe vā dhamme upapajje² vā apare vā pariyāye. na tvevāham bhikkhave sancetanikānam kammānam katānam upacitānam appaţisamviditvā dukkhassantakiriyam vadāmi.
- 2. sa kho so bhikkhave ariyasāvako evam vigatābhijjho vigatavyāpādo asammūļho sampajāno patissato mettāsahagatena cetasā ekam disam pharitvā viharati. tathā dutiyam tathā tatiyam tathā catuttham³ iti uddhamadho tiriyam sabbadhi sabbattatāya⁴ sabbāvantam lokam mettāsahagatena cetasā vipulena mahaggatena appamāņena averena abyāpajjena pharitvā viharati.
- 3. so evam pajānāti: "pubbe kho me idam cittam parittam ahosi abhāvitam. etarahi pana me idam cittam appamāṇam subhāvitam. yam kho pana kiñci pamāṇakatam kammam, na tam tatrāvasissati. na tam tatrāvatiṭṭhatī'ti.
- **4.** tam kim maññatha bhikkhave daharatagge ce so ayam⁵ kumāro mettam ceto vimuttim bhāveyya, api

¹appaţisaṃveditvā - machasaṃ

²upapajjam vā - sīmu, machasam

³tathā catutthim - machasam

⁴sabbatthatāya - sī, mu

⁵ce ayaṃ - syā.

nu kho pāpakammam kareyyāti?

- no hetam bhante. 5.
- akarontam kho pana papakammam api nu kho dukkham phusevvāti?
- 7. no hetam bhante, akarontam hi bhante pāpakammam kuto dukkham phusissatī ti.
- bhāvetabbā kho panāyam bhikkhave mettācetovimutti itthiyā vā bhikkhave purisena vā. itthiyā vā bhikkhave purisassa vā nāyam kāyo ādāya gamanīyo. cittantaro bhikkhave macco. so evam pajānāti: "yam kho me idha⁶ kiñcī pubbe iminā karajakāyena pāpakammam katam, sabbam tam idha vedanīyam, na tam anugam bhavissatī"ti.
- evam bhāvitā kho bhikkhave mettācetovimutti anāgāmitāya samvattati, idha paññassa bhikkhuno uttarim vimuttim appativijihato.
- 10. karunāsahagatena cetasā ekam disam pharitvā viharati. muditā sahagatena cetasā ekam disam pharitvā viharati. upekkhāsahagatena cetasā ekam disam pharitvā viharati. tathā dutiyam tathā tatiyam tathā

⁶idam - machasam

catuttham iti uddhamadho tiriyam sabbadhi sabbattatāya sabbāvantam lokam upekkhāsahagatena cetasā vipulena mahaggatena appamāņena averena abyāpajjena pharitvā viharati.

- 11. so evam pajānāti, "pubbe kho me idam cittam appamāņam parittam ahosi abhāvitam, etarahi pana me idam cittam subhāvitam. yam kho pana me kiñci pamāṇakatam kammam, na tam tatrāvasissati, na tam tatrāvatiţthatī"ti.
- **12.** tam kim maññatha bhikkhave daharatagge ce so ayam kumāro upekkham cetovimuttim bhāveyya, api nu kho pāpakammam kareyyāti?
- **13.** no hetam bhante.
- **14.** akarontam kho pana pāpakammam api nu kho dukkham phuseyyāti?
- **15.** no hetam bhante. akarontam hi bhante pāpakammam kuto dukkham phusissatī ti.
- 16. bhāvetabbā kho panāyaṃ bhikkhave upekkhā cetovimutti itthiyā vā purisena vā. itthiyā vā bhikkhave purisassa vā nāyaṃ kāyo ādāya gamanīyo. cittantaro ayaṃ bhikkhave macco. so evaṃ pajānāti: "yaṃ kho me idha kiñci pubbe iminā karajakāyena pāpakammaṃ

katam, sabbam tam idha vedaniyam. na tam anugam bhavissatī ti.

17. evam bhāvitā kho bhikkhave upekkhā cetovimutti anāgāmitāya samvatta ti. idha paññassa bhikkhuno uttarim vimuttim appaṭivijjhato ti,